

四庫全書

子部

欽定四庫全書

冊府元龜卷六百三十九

宋王欽若等撰

貢舉部

總序

三代貢舉之制始于鄉大夫其升于司徒曰秀士升于
太學曰俊士升于司馬曰進士然則鄉大夫暨于司馬
皆貢舉之官也秦之制無聞焉漢高祖始詔御史中執
法下郡守勸勉賢者詣相國府署行義年文帝詔諸侯

王公卿郡守舉賢良能直言極諫者元帝又詔丞相御史舉質樸敦厚遜讓有行又詔列侯舉茂才又舊儀刺史二千石察舉茂才尤異此則漢之諸侯王丞相御史九卿列侯刺史郡守皆有舉士之制而丞相之府實司其事武帝令太常籍博士弟子有秀才異等輒以名聞又光祿勳銓第郎吏歲舉秀才庶吏此則太常光祿勳別有舉士之制也至成帝初置尚書常侍曹主公卿又置二千石曹掌郡國二千石則尚書主選舉之始也後

漢三公將軍光祿勳廷尉司農中二千石司隸州牧歲
舉茂才廉吏郡國歲舉孝廉三公上尚書輒勞其舉將
又大學試明經弟子此與西漢之制畧同其後改常侍
曹為吏曹亦曰選部又公府西曹主府吏置用東曹主
二千石長史選除于時選舉之制於郡國屬功曹於公
府屬東西曹於尚書屬吏部而尚書令僕總之魏司空
陳羣以為天臺選用不悉人才每郡擇有鑒照者除為
中正目狀人才澄汰九品又置州都總其事應璩所謂

百郡立中正九州置都士又吳亦有大公平若魏之州都而蜀無聞焉晉宣帝除九品州置大中正大中之職掌訪問鄉邑考績德行以定上格下格選平正無禮力貶清議晉令大小中正為內官聽月二會議上東門外州及郡國亦舉孝廉秀才其在天臺則吏部州則別駕西曹郡國則功曹主其事宋齊亦如之而宋文帝不欲重權在下故分置二吏部尚書以散其權梁無中正天監中州置州望郡置郡宗鄉置鄉豪各一人專典搜

薦無復膏梁寒素之隔普通七年又詔州郡歲舉人敬
帝復令諸州各置中正選舉皆中正押上然後量試不
然則否陳亦如之後魏州郡皆有中正掌選舉每以季
月與吏部銓擇可否其秀才對策居中上表敘之崔浩
為冀州大中正薦冀定相幽并五州士數十人各起家
為郡守自太和以前精選中正德高鄉國者充之其邊
州小郡人物單眇者則併附佗州其在僻陋則闕而不
置當時稱為簡當頗曰得人及宣武孝明之時州無大

小必置中正既不可悉得其人故有蕃落庸鄙操銓覈之權而選敘顏秦正始初乃罷諸郡中正而吏部之職皆如往制北齊選舉亦沿後魏凡州縣皆置中正中書策秀才集書策貢士考功策廉良天子常服乘輿坐朝堂中楹秀孝各以班草對字有脫誤者呼起立席後事有濫劣者飲墨水一升文理孟浪者奪席脫容刀孝昭帝孝建二年詔內外執事官每三年之內各舉一人居白屋巾褐未釋亦舉之後周初蘇綽為六條詔書其四

曰擢賢良懲魏齊之失罷門資之制其所察舉頗加精
慎武帝平齊詔山東縣舉明經幹理宣帝亦詔州舉高
才博學者為秀才郡舉經明行修者為孝廉依六官之
制建吏部中大夫掌選舉小吏部下大夫一人以貳之
隋開皇七年制諸州歲貢士十八年又詔京官五品已
上總管刺史以主行修謹清平幹濟二科舉人皆吏部
主之初漢魏之郡佐史皆刺史二千石辟署北齊多繇
中用故州郡辟士之權移於朝廷後周復遵古制及隋

皆歸吏部故朝廷貢舉之制盛矣唐循隋制諸郡貢士常貢之科有秀才有明經有進士有明法有明書有明算自京師崇文館國子監郡縣皆有學焉每歲仲冬國子郡縣課試其成者長吏會屬僚設賓主陳俎豆備管弦牲用少牢行鄉飲酒歌鹿鳴之詩徵耆艾敘少長而觀焉就餞而與計偕其不在學而舉者謂之鄉貢至尚書省始繇戶部集閱而關於考功課試可者為第武德舊制以考功郎中監試貢舉貞觀已後則考功員外郎

專掌之武后載初元年策問貢舉人于雒城殿前試貢
舉人自此而始長安二年又教人習武藝每歲如明經
進士之法行鄉飲酒之禮送于兵部明皇開元二十四
年制令禮部侍郎專掌貢舉初因考功員外李昂詆訶
進士李權文章大為權所凌訐朝議以郎官地輕故移
於禮部又詔應試進士等唱第訖具所試送中書門下
詳覆是年始置禮部貢舉印其後禮部侍郎闕人亦以
佗官主之謂之權知貢舉其知貢舉者皆朝廷美選二

十九年京師又置宗玄館諸州置道學生有差道學生
謂之道舉課試與明經同先是掌貢舉官親族皆於禮
部差郎官考試有及第者尚書覆定及第者仍別奏謂
之奏移送吏部令考功員外試練侍郎覆定及第者仍
別奏謂之別頭舉人

代宗永泰元年始置兩都貢舉禮部侍郎官號皆以兩
都為名每歲兩地別所及第至大歷十一年停東都貢
舉德宗貞元十六年又罷別頭舉人文宗太和元年又

權於東都置貢舉又有制詔舉人皆標其目而搜揚之志烈秋霜詞殫文律抱器懷能茂才異等才膺管樂道侔伊呂賢良方正軍謀宏遠明於體用達於吏理之類始於顯慶盛於開元貞元皆試於殿廷乘輿親臨觀之試已糊其名於中考之策高者特授美官其次與出身又有吏部科目曰宏詞拔萃平判官皆吏部主之又有三禮三傳三史五經九經開元禮等科有官階出身者吏部主之白身者禮部主之其吏部科目禮部貢舉

皆各有考官大抵銓選屬吏部貢舉屬禮部崇文館生屬門下省國子學生屬國子監州府鄉貢屬長官職司在功曹司功五代因之夫以賢為實得士者昌聖賢之談邦國之制也貢舉之設王政攸先方冊所傳舊章不墜或有公直以馳譽精識以知名不徇乎朋家咸求乎藝實故能若水鑒之皦衡石之平增臺閣之輝副文儒之望亦有昧於遠體拘乎小節或鄭雅而靡辨或涇渭而共流以公器而徇私恩採虛聲而損至學俾白駒以

興刺使嘉魚而絕詠斯為蠹政良足憤惋今乃紀善惡之迹著得失之效用為勸沮以示方來凡貢舉部七門

條制

夫鄉舉里選辨論官材蓋成周之制也所以洽烝髦之詠成思皇之美藹藹而多吉士焉及諸侯力政家邦異俗斂才之道聞而無聞漢室龍興首議聘士其後增設科目詳延英彥至乃限郡國以所舉之數威守相以蔽賢之罰馳單車以博訪詔有位以薦能計偕續食既優

其待遇署職補吏復著於品式課試之典亦增損之有殊年族之制固因革之斯異稽於前志咸用論次以為貢籍故事云

周官大司徒職教萬民而賓興之一曰六德二曰六行三曰六藝詩書禮樂謂之四術四術既修九年大成凡士之有善鄉先論士之秀者升諸司徒曰選士司徒論選士之秀者而升諸學曰俊士既升而不征者曰造士大樂正論造士之秀升諸司馬曰進士司馬論進士之

賢者及鄉老郡吏以賢能之書皆獻於王登於天府藏

於祖廟內史書其貳而行焉

書其貳謂
寫其副本

在其職也則鄉

老鄉大夫舉賢能而賓其禮司徒教三物而興諸學司

馬辨官材以定其論太宰詔廢置而持其柄內史贊予

奪而貳於中司士掌其版而知其數論定然後官之任

官然後爵之位定然後祿之蓋擇材取士如此之詳也

漢高帝十一年二月下詔曰賢士大夫既與我定有天

下而不與吾共安利之可乎有肯從我遊者吾能尊顯

之以布告天下御史中執法下郡守其有稱意明德者

必身勸為之駕

有賢者郡守身自往勸勉今至京師駕車遠之

遣詣相國府署

行義年

行狀年紀也

有而弗言覺免年老癯病勿遣

惠帝四年正月詔舉人孝悌力田者復其身

武帝建元元年十月詔天下舉賢良方正直言極諫之

士其理申商韓非蘇秦張儀之言亂國政皆罷之

申商韓非

刑名之學蘇張縱橫之說竝不用也

元光元年十一月舉賢良董仲舒對策請令諸侯列卿

郡守二千石各擇其吏人之賢者歲貢各二人以給宿

衛且以觀大臣之能所貢賢者有賞不肖者有罰夫如

是諸侯吏二千石皆盡心於求賢天下之士可得而官

使也

授之以官以使其材也

無以日月為功實試賢能為上量材

而授官錄德而定位

錄謂存錄也

則廉恥殊路賢不肖異處

矣帝因是令郡國舉孝廉各一人

孝者善事父母者也廉謂清潔有廉隅者也

也

五年詔徵吏民有明當代之務習先聖之術者縣次續

飡令與計偕

計者上計簿使也郡國每歲遣詣京師上之偕者俱也令所徵之人與上計者俱來

而縣次給之食也

元朔元年十一月詔曰公卿大夫所使總方畧一統類

廣教化美風俗也夫本仁祖義褒德錄賢勸善刑暴五

帝三王所繇昌也朕夙興夜寐嘉與宇內之士臻於斯

路故旅耆老

加惠於耆老之人若賓旅也

復孝敬選豪俊講文學稽

叅政事祈進民心深詔執事興廉舉孝庶幾成風紹休

聖緒夫十室之邑必有忠信三人竝行厥有我師今或

至闔郡而不薦一人是化不下究而積行君子壅於上
聞也二千石官長紀綱人倫將何以佐朕燭幽隱勸元
元厲蒸庶崇鄉黨之訓哉且進賢受上賞蔽賢蒙顯戮
古之道也其與中二千石禮官博士議不舉者罪有司
奏議曰古者諸侯貢士一適謂之好德再適謂之賢賢
三適謂之有功乃加九錫不貢士一則黜爵再則黜地
三則黜爵地畢矣夫附下罔上者死附上罔下者刑與
聞國政而無益於民者斥在上位而不能進賢者退此

所以勸善黜惡也今詔書昭先帝聖緒令二千石舉孝廉所以化元元移風易俗也不舉孝不奉詔當以不敬

論不察廉不勝任也當免奏可

凡郡國之官非傅相其他既自置置又調屬僚

及部人賢者舉為秀才廉吏而貢於王庭多拜為郎居三署無常員或至千人屬光祿勳故鄉校牧守居閑待詔或郡國貢選公車徵起悉在焉光祿勳復於三署中銓第郎吏歲舉秀才廉吏出為佗官以補缺員

五年六月公孫弘以儒術為丞相天下之學士靡然向風時太常孔臧等議曰請為博士官置弟子五十人復其身太常擇民年十八以上儀狀端正者補博士弟子

郡國縣道邑有好文學敬長上肅政教順鄉里出入不悖所聞令相長丞上屬所二千石謹察可者與計偕詣太常得受業如弟子一歲皆課能通一藝以上補文學掌故缺其高第可以為郎中太常籍奏即有秀才異等輒以名聞其不事學若下材及不能通一藝罷之而請諸能稱焉

孝昭始元初遣故廷尉王平等五人

前為此官今不居官皆謂之故

持

節行郡國舉賢良

後漢光武十二年詔三公舉茂才各一人監御史司隸州牧歲舉茂才各一人

章帝建初元年詔曰夫鄉舉里選必累功勞今刺史守

相不明真偽茂才孝廉歲以百數

漢曰秀才後漢避光武諱故曰茂才魏復

曰秀才既非能者而當授之政事甚無謂也每尋前代舉

人貢士或起畎畝不繫閭閻敷奏以言則文章可採明試以功則理有異迹文質彬彬朕甚嘉之始復用前漢

丞相故事以四科辟士

武帝因董仲舒之言立制故事在丞相府今復用之第一科補

西曹南閭祭酒二科補儀曹三
科補四辟八表四科補賊曹

凡所舉士先試之以職

乃得充選其德行尤異不宜試職者疏於佗狀舉非其
人兼不舉者罪

和帝時大郡口五六十萬舉孝廉二人小郡二十萬并
有蠻夷者亦舉二人帝以為不均下公卿會議司徒丁
鴻司空劉方上言凡口率之科宜有偕品蠻夷雜錯不
得為數自今郡國率二十萬口歲舉孝廉一人四十萬
二人六十萬三人八十萬四人百萬五人百二十萬六

人不滿二十萬二歲一人不滿十萬三歲一人帝從之
又制緣邊郡口十萬以上歲舉孝廉一人不滿十萬二
歲舉一人五萬以下三歲一人

永元十四年司空徐防上疏曰臣以為博士及甲乙試
策宜從其家章句開五十難以試之解釋多者為上第

引文明者為高說若不依先師義有相伐

伐謂自相
攻伐也

皆

正以為非五經各取上第六人論語不宜射策雖所失

或久差可矯草

東觀記防上疏曰試論語本文章句粗
通度物以射策與今學者務本有所一

心專精師門思核經意事得其實道得其真於此弘廣
經術尊崇聖業有益於化雖從來久大經衰微學問寔
淺誠宜反本
以矯其失
詔書下公卿皆從防言

安帝永初二年九月詔居鄉里有廉清孝順之稱才任
理人者國相歲移名與計偕上尚書公府通調令得外
補

順帝永建六年七月以太學新成試明經下第者補弟
子增甲乙科員各十人除郡國耆儒九十人補舍人

九月初令郡國舉孝廉限年四十以上諸生通章句文

史能賤奏乃得應選其有茂才異行若顏淵子竒不拘
年齒時尚書左雄上言郡國孝廉古之貢士則宰民宣
協風教若有面牆則無所施用孔子曰四十不惑禮稱
強仕請自今孝廉年不滿四十不得察舉皆先詣公府
諸生試家法文史課賤奏副之端門練其虛實以觀異
能以美風俗有不承科令者正其罪法若有茂才異行

若顏淵子竒自可不拘年齒帝從之於是班下郡國

云又

尚書僕射胡廣以雄議改察舉之制限年四十以上儒
者試經學文史試章奏與尚書史敞郭虔奏收曰選舉

因才無拘定制漢承周秦兼覽殷夏祖德師經泰維伯
執聖主賢臣世以制理貢舉之制莫或因革今以一臣
之言別奏舊章利便未明衆心莫厭愚
以為可宣下百官忝其同異帝不從
尚書令黃瓊又

以雄所上孝廉之選專用儒學文吏於取士之義猶有
所遺乃奏增孝弟及能從政者為四科事竟施行

桓帝建和元年詔諸學生年十六以上比郡國明經試
次第上名高第十五人上第十六人為郎中第十七
名為太子舍人下第十七人為王家郎

永壽二年詔復課試諸生補郎舍人其後復制學生滿

二歲試通二經者補文學掌故其不能通二經者須後
試復隨革試試通一經者亦得為文學掌故考滿二歲
試能通三經者擢其高第為太子舍人其不得第者後
試復隨革試第復高者亦得為太子舍人已為太子舍
人滿二歲能通四經者擢其高第為郎中其不得第者
後試復隨革試第復高者亦得為郎中滿二歲試能通
五經者擢其高第補吏隨才而用其不得第者後試復
高亦得補吏

魏文帝黃初二年正月初令郡國口滿十萬者歲察孝

廉一人其有秀異無拘戶口

三府議舉孝廉本以德行不復限以試經司徒華歆

以為喪亂以來六籍墜廢當務存立以崇王道夫制法者所以經盛衰今聽孝廉不以經試恐學業遂從此而

廢若有秀異可特徵用患於無其人何患不得哉帝從其言又魏郡潁川典農中郎將裴潛奏通貢舉比之郡

國錄是農官進仕路泰

三年正月詔曰今之計考古之貢士也十室之邑必有

忠信若限年然後取士是呂尚周晉不顯於前世也其

令郡國所選勿拘老幼儒通經術吏達文法到皆試用

有司糾正不以實者

明帝太和四年二月詔曰世之質文隨教而變兵亂以來經學廢絕後生進趣不繇典謨豈訓導未洽將進用者不以德顯乎其郎吏學通一經才任牧民博士課試擢其高第者亟一用其浮華不務道本者皆罷退之

晉元帝初制揚州歲舉二人諸州各一人先是以兵亂務存慰悅遠方孝秀到不策試普皆除署至是帝申明舊制皆令試經有不中舉者制刺史太守免官大興三

年秀孝多不敢行其有到者竝託疾帝欲除署孝廉而秀才如前制尚書郎孔坦奏議曰臣聞經邦建國教學為先移風崇化莫尚斯矣古者且耕且學三年而通一經以平康之世猶假漸漬積以日月自喪亂以來十有餘年干戈載揚俎豆禮戢家廢講誦國闕庠序率爾責試竊以為疑然宣下以來涉歷三載累遇慶會遂未一試揚州諸郡接近京都懼累其君父多不敢行其遠州邊郡掩誣朝廷冀於不試冒昧來赴既到審試遂不敢

會臣愚以不會與不行其為闕也同若當徧加除署是為肅法奉憲者失分僥倖投射者得官頽風傷教懼於是始夫王言如絲其出如綸臨事改制示短天下人聽有惑臣竊惜之愚以王命無二憲制宜信去年察舉一皆試策如不能試言不拘到遣歸不署又秀才難以試策亦記問經義苟所未學實難閣通不足復曲碎乖例違舊造異謂因其不會徐更革制可申明前下崇修學校普延五年以展講習鈞法齊訓示人軌則夫信之與

法為政之綱施之家室猶弗可二况經國之典而可翫
黷乎帝納馬聽孝廉申至七年秀才如故

宋制丹陽吳郡會稽吳興四郡歲舉二人餘郡各一人
凡州秀才郡孝廉至皆策試天子或親臨之及公卿所
舉皆屬于吏部序才銓用凡舉得失各有賞罰失者其

人宜加禁錮年月多少隨辜議制

晉末諸州郡所遣秀才孝廉多非其人高

祖作相表天子申明舊制依舊策試

文帝元嘉中限年三十而仕

孝武即位仕者不復拘老幼

明帝泰始三年都令史駱宰議策秀孝格五問竝得為
上四三為中二為下一不合與第尚書郎謝超宗議以
為片辭折獄寸言挫衆魯史褒貶孔論興言皆無俟繁
而後秉裁夫表事之淵析理之會豈必委牘方切治道
非患對不盡問患以常文弗奇必使一通峻正寧劣五
通而常與其俱奇一亦宜採詔從宰議

南齊習宋代限年之制然而鄉舉里選不覈才德其所

進取以官婚冑籍為先遂令甲族以二十登仕後門以三十試吏故有增年矯貌以圖進者其時士人皆厚結姻援奔馳造請浸以成俗

和帝時梁高祖為相上表曰聞中間立格甲族以二十登仕後門以過立試吏求之愚懷抑有未達何者設官分職惟才是務若限歲登朝必增年就官故貌實幼童籍已踰立滓穢名教於斯為甚詔依表施行

梁初無中正制年二十有五方得入仕

天監四年正月詔曰今九流常選年未三十不通一經不得解褐若有才同甘顏勿限年次

五年正月詔曰在昔周漢取士方國頃代彫訛幽仄罕被人孤地絕用隔聽覽士操淪胥因茲靡勸豈其嶽瀆縱靈偏有厚薄實絲知與不知用與不用耳朕以菲德君此兆民而兼明廣炤屈於當戶飛耳長目不及四方永言愧懷無忘旦夕凡諸郡國舊族邦內無在朝位選官搜括使郡有一人

七年二月詔於州郡縣置州望郡宗鄉豪各一人專掌
搜薦

八年五月詔曰學以從政殷勸往哲祿在其中抑亦前
事朕思闡治綱每敦儒術輔閭闔館造次以之故負褒
成風甲科間出方當置諸周行飾以青紫其有能通一
經始末無倦者策貫之後選可量加敘錄雖復牛監羊
肆寒品後門竝隨才試吏勿有遺隔

陳依梁制凡年未三十不得入仕唯經學生策試得第

諸州迎主簿西曹左奏及常為挽郎得未壯而仕諸郡
惟正王為丹陽尹經迎得出身者亦然庶姓尹則否有
高才異行殊勲別降恩旨敘用者不在常例

後魏孝文延興二年六月詔頃者州郡選貢多不以實
碩人所以窮處幽仄鄙夫所以超分妄進豈所謂旌賢
樹德者也近年貢舉尤為猥濫自今年貢舉所遣皆須
盡州郡之高才極鄉閭之後選

太和十五年八月詔諸州舉秀孝先盡才學

宣武詔庶族子弟年未十五不聽入仕

封軌為考功郎中奏請遣四門博士明經學者簡試諸州學生詔從之

孝明熙平元年初聽秀才對策第居中上敘之

莊帝初詔求德行文藝政事強直者縣令郡守刺史皆敘其志業且以表聞待三人以上縣令太守刺史賞一階舉非其人者黜一階

北齊選舉多沿後魏之制其課試之法中書策秀才集

書策考貢士考功郎中策廉良天子常服乘輿出坐於
朝堂中楹秀孝各以班草對字有脫誤者呼起立席後
書有濫劣者飲墨水一升文理孟浪者奪席脫容刀

後周文帝霸府時蘇綽為六條詔書其四曰擢賢良綽
深思本始懲魏齊之失罷門資之制其所察頗加精慎
武帝建德六年七月詔山東諸州舉有才者上縣六人
中縣五人下縣四人赴行在所共論政理得失

九月詔東土諸州儒生明一經已上竝舉送那郡以禮

發遣

宣帝宣政元年八月詔制九條宣下郡州其八曰州舉高才博學者為秀才郡舉經明行修者為孝廉上州上郡歲三人下州下郡歲一人

隋文帝開皇七年正月制諸州歲貢三人

十六年六月制工商不得進仕

十八年八月詔京官五品以上及總管刺史竝以志行修謹清平幹濟二科舉人

唐貢士之法多循隋制上郡歲三人中郡二人下郡一人有才能者無常數其常貢之科有秀才有明經有進士有明法有書有算自京師郡縣皆有學焉每歲仲冬郡縣館監課試其成者長吏會屬僚設賓主陳俎豆備管弦牲用少牢行鄉飲酒禮歌鹿鳴之詩徵耆艾敘少長而觀焉既餞而與計偕其不在館學而舉者謂之鄉貢舊令諸郡雖一二人之限而實無常數到尚書省給繇戶部集閱而闕于考功課試可者為第初秀才科

第最高試方畧策五條有上上中上下中上凡四等貞觀中有舉而不第者坐其州長繇是廢絕自是士族所趨嚮惟明經進士二科而已其初止試策

貞觀八年詔加進士試讀經史一部

開元二十四年以後復有秀才舉具

時以進士漸難而秀才本科無貼經及雜文之限反易於進士主司以其科廢久不欲收獎應者多落之三十年來無登第者至天寶初禮部侍郎韋陟始奏請有堪此舉者乃令官長時考其常年舉送者並傳

九年五月二十日勅自今已後明經兼習周禮若儀禮者於本色內量減一選

高宗上元二年正月勅明經加試老子策二條進士加
試帖三條

儀鳳三年五月勅自今已後道經孝經竝為上經貢舉
人竝須兼通其餘經及論語任依常式

調露二年四月劉思立除考功員外郎先時進士但試
策而已思立以其膚淺奏請帖經及試雜文自後因以
為常

永隆二年八月詔曰學者立身之本文者經國之資豈

可假以虛名必須徵其實效如聞明經射策不讀正經抄撮義條纔有數卷進士不尋史傳惟誦舊策共相模擬本無實才所司考試之日曾不簡練因循舊例以分數為限至於不辨章句未涉文者以人數未克皆聽及第其中亦有明經學業該深者惟許通六進士文理華贍者竟無甲科銓綜藝能遂無優劣試官又加顏面或容假手更相囑請莫憚糾繩絲是僥倖路開文儒漸廢興廉舉孝因此失人簡賢任能無方可致自今已後考

功試人明經試帖取十帖得六已上者進士試雜文兩
首識文律者然後竝令試策仍嚴加捉搦必材藝灼然
合昇高第者竝即依令其明法并書算貢舉人亦量准
此例即為常式

永淳二年三月初令應詔舉人竝試策三道即為永例
則天載初元年二月十四日試貢舉人于洛城殿前數

日畢

殿前試人
自茲始也

長壽二年二月令貢舉人習則天所撰臣軌傳通老子

道德經

十月左拾遺劉承慶上疏曰伏見比年已來天下諸州所貢物至元日皆陳在御前惟貢人獨於朝堂拜列但孝廉秀異國之英才既隨方物以充歲貢宜同珍幣列見王庭豈得金帛羽毛昇於玉陛之下賢良文學棄彼金門之外恐所謂貴財而賤義重物而輕人甚不副陛下好道之心尊賢之意伏請貢舉人至元日引見列在方物之前以播克庭之禮從之

長安二年正月初令天下諸州有練習武藝者每年准明經進士例舉送

中宗神龍二年二月制貢舉人停習臣軌依舊習老子
玄宗開元六年二月制曰我國家敦古質斷浮豔禮樂
詩書是弘文德綺羅珠翠深草弊風必使情見於詞不
用言浮於行比來選人試判舉人對策剖析案牘敷陳
奏議多不切事宜廣張華飾何大雅之不足而小能之
是銜自今已後不得更然

七年三月制曰孝經者德教所先自頃已來獨宗鄭氏
孔氏遺旨今則無聞又子夏易傳近無習者輔嗣注者
亦甚甄明諸家所傳互有得失獨據一說能無短長其
令儒官詳定所長令明經者習讀若將理等亦可兼行
其習易者兼帖子夏易傳共為一部亦詳其可否奏聞
五月太子左庶子劉子玄奏孝經註請廢鄭依孔老子
注請停河上公行王輔嗣易傳非子夏所造禮部奏議
請准令式孝經鄭註與孔傳依舊俱行子夏易傳無益

後學不可將帖正經勅曰朕以全經道喪大義久乖淳
感之性浸微流遁之原未息是用旁求廢簡遠及缺文
欲使發揮異說同歸善道永惟一致之用以開百行之
端間者諸儒所傳頗乖通義敦孔學者異鄭門之息滅
尚今文者指古傳為誣偽豈朝廷竝列書府以廣儒術
之心乎况孔鄭大宗固多殊趣諸生會議曾無所申而
推求小疵其細已甚聚訟之訛人無則焉其何鄭二家
可令仍舊行用王孔所註傳習者希宜存繼絕之典頗

加獎飾子夏傳逸篇既廣前令帖易者停

八年七月國子司業李元瓘上言三禮三傳及毛詩尚書周易等竝聖賢微旨生徒教業必事資經遠則斯道不墜今明經所習務在出身咸以禮記文少人皆諳讀周禮經邦之軌則儀禮莊敬之楷模公羊穀梁歷代宗習今兩監及州縣以獨學無友四經殆絕既事資訓誘不可因循其學生望請各量配作業并貢人預試之日習周禮儀禮公羊穀梁竝請帖十通五許其入策以此

開勸即望四海均習九經該備從之

十六年十二月二十四日國子祭酒楊瑒奏今之舉明經者主司不詳其述作之意每至帖試必取年頭年月孤經絕句自今已後考試者盡帖平文以存大典又曰今之明經習左氏者十無一二恐左氏之學廢又周禮儀禮公羊穀梁亦請量加優獎遂下制明經習左氏及通周禮等四經者出身免任散官

十七年三月國子祭酒楊瑒上言曰伏聞承前之例每

年應舉常有千數及第兩監不過一二十人臣恐三千
學徒虛費官廩兩監博士濫靡天祿臣竊見入仕諸色
出身每歲向二千餘人方於明經進士多十餘倍自然
服勤道業之士不及胥吏以之效官豈識先王之禮義
陛下設學校務以勸進之有司為限約務以黜退之臣
之微誠實所未曉今監司課試十已退其八九至及第
十又不收一二若長以此為限恐儒風漸墜小道將興
若以出身人多應須諸色都減豈在獨抑明經進士也

帝然之

二十一年御注老子成詔天下每歲貢士減尚書論語策而加老子焉

二十二年三月制曰博學多才道術醫藥舉人等先令所司表薦兼自聞達勅限以滿湏加考試博學多才舉人限今年四月內集道術醫藥舉人限閏三月內集其博學科試明三經兩史已上帖試稍通者多才科試經國商畧大策三道并試雜文三道取其詞氣高者道術

醫藥舉取藝業優長試練有效者宜令所繇依節限處分

二十三年十月制曰文學政事必在考言孝悌力田必須審行頃從一概何謂四科其孝悌力田舉人宜各自疏比來事迹為鄉閭所委者朕當案覆別有處分

二十四年三月制曰每歲舉人求士之本專典其事寧不重歟頃年以來惟考功郎所職位輕務重名實不倫欲盡委長官又銓選猥積且六官之列體骨是同况宗

伯掌禮宜主賓薦自今已後每歲諸色舉人及齋郎等簡試竝於禮部集既衆務煩雜仍委侍郎專知

二十五年正月制曰致理興化必在得賢強識博聞可以從政且今之明經進士則古之孝廉秀才近日以來殊乖本意進士以聲韻為學多昧古今明經以帖誦為功罕窮旨趣安得為敦本復古經明行修以此登科非選士取賢之道也其明經自今已後每經宜帖十取通五已上免舊試一帖仍案問大義十條取通六已上免

試經策十條令答時務策三首取粗有文性者與及第
其進士宜停小經准明經例帖大經十帖取通四已上
然後准例試雜文及策考通與及第其明經中有明五
經以上試無不通者進士中兼有精通一史能試策十
條得六已上者委所司奏聽進止其應試進士等唱第
訖具所試雜文及策送中書門下詳覆其所問明經大
義日仍須對同舉人考試庶能否共知取舍無媿有功
者達可不勉與

此詔因侍郎
姚奕奏也

二十六年正月丁丑制曰古者鄉有序黨有塾將以弘長儒教誘進學徒化人成俗率繇於是斯道久廢朕用憫焉宜令天下州縣每一鄉之內里別各置學仍擇師資令其教授其諸州鄉貢明經進士每年引見訖更令國子監謁先師所司設食學官等為之開講質問疑義且公侯之緒皆稟義方學禮聞詩不應失墜容其微倖是長慢游如聞比來弘文崇文學生緣是貴胄子孫多有不專經業便與及第深謂不然自今已後宜一依令

式試

壬辰詔曰孝悌力田風化之本苟有其實未必求名比
年將同舉人考試詞策便與及第以常為科是開僥倖
之門殊乖敦勸之意自今已後不得更然其兼著狀迹
殊尤者委所繇長官時以名薦朕當別有處分更不須
隨考使例申送

二十九年正月於京師置崇玄館諸州置道學生徒有

差

京師各百人諸州無常員習老莊
文列謂之四子陰第與國子監同

謂之道舉舉送課

試與明經同凡舉司課試之法帖經者以所習經掩其
兩端中間惟開一行裁紙為帖凡帖三子隨時增損可
否不一或得四得五得六者為通

後舉人積多故其法益難務欲落之至有

帖孤章絕句疑似參互者以惑之甚者或上抵其注下
餘一二字使尋之難知謂之例援既甚難矣而舉人則
有注睽孤絕索幽隱為詩賦而誦習之不過十數
篇則難者悉詳矣其於平文大義或多牆面焉

冊府元龜卷六百三十九

欽定四庫全書

冊府元龜卷六百四十

宋王欽若等撰

貢舉部

條制第二

唐天寶元年四月詔曰化之原者曰道道之用者為德其義至大非聖人孰能章之昔有周季年代與道喪我列祖玄元皇帝乃發明妙本汲引生靈遂著玄經五千言用救時弊義高象繫理貫希夷非百氏之能儔豈六

欽定四庫全書

冊府元龜
卷六百四十

經之所擬承前習業人等以其卷數非多列在小經之
目微言與旨稱謂殊乖自今以後天下應舉除崇玄學
生外自餘所試道德經宜竝停仍令所司更詳擇一小
經代之其道經為上經德經為下經庶乎道尊德貴是
崇是奉凡在遐邇知朕意焉

五月中書門下奏兩京及諸郡崇玄學生等准開元二
十九年正月制前件人合習道德及南華通玄冲虛等
四經又准天寶元年二月制改庚桑子為洞靈真經准

諸條補崇玄學亦合習讀伏准後制合通五經其洞靈
真經人間少本臣近令諸觀尋訪道士全無習者本既
無廣業實難成并通玄冲虛二經亦恐文字不定玄教
方闡學者宜精其洞靈等三經望付所司各寫十本校
定訖付諸道採訪使頒行其貢舉司及兩京崇玄學生
亦望各付一本今冬崇玄學人望且准開元二十九年
正月諸條考試其洞靈真經請待業成後准式從之
二年三月十六日制崇玄生試及帖冊各減一條三年

業成始依常式

七載五月詔曰道教之設淳化之源必在弘闡以敦風俗頃列四經之科將冠九流之首雖及門求進頗有其人而覩奧窮微罕聞達者豈專精難就為勸獎未弘天下諸色人中有通明道德經及南華等四經任於所在自舉各委長官考試申送其崇玄生出身自今以後每至選宜減於常例以為留放

十一載七月舉人帖及口試竝宜對衆考定便唱通否

十二月勅禮部舉人比來試人頗非允當帖經首尾不出前後復取者也之乎頗相類之處下帖為弊已久須是釐革禮部起請每帖前後各出一行相類之處並不須帖是載禮部侍郎楊浚始開為三行

不得帖斷絕疑似之言也

明

經所試一大經及孝經論語爾雅帖各有差帖既通而口問之一經問十義得六者為通而後試策凡三條三

試皆通者為第進士所試一大經及爾雅

舊制帖一小經并註開元

二十五年改帖大經其爾雅亦并帖註也帖既通而後試文試賦各一篇文

通而後試策凡五條三試皆通者為第

經策全通為甲
策道四帖通四

帖以上為乙策道三帖通三以下及策雖全通而帖經
文不通四或帖經雖通四以上而策不通四皆為不第

明法試律令各十帖試冊共十條

律七條
令三條

全通為甲通

八以上為乙自七以下為不第書者試說文字林凡十

帖

說文六帖
字林四帖

試無常限皆通者為第算者試九章海島

孫子五曹張丘建夏侯陽周髀五經綴術緝古帖各有

差

九章九帖五經等七部各
一帖綴術六帖緝古四帖

兼試問大義皆通者為第

凡衆科有能兼學則加超獎不在常限案今科第秀才

與明經同為四等進士與明法同為二等然秀才之科
久廢而明經雖有甲乙丙丁四科進士有甲乙二科自
武德以來明經惟有丙丁第進士惟乙科而已先試之
期命舉人謁于先師有司卜日宿張於國學宰輔以下
皆會而觀焉博集羣議講論而退禮部闕試之日皆嚴
設兵衛薦棘圍之搜索衣服譏訶出入以防假濫焉其
進士大抵千人得第者一二明經倍之得第者十一二
其制誥舉人不有常科皆標其目而搜揚之試之日或

在殿庭天子親臨觀之試已糊其名於中考之文冊高者特授以美官其次與出身開元以後四海晏清士無賢不肖恥不以文章達其應詔而舉者多則二千人少猶不減千人所收百纔有一

十二載七月詔天下舉人不得充鄉試皆須補國子學生及郡縣學生然後聽舉四門博士停

十三載十月御含元殿親試博通墳典洞曉玄經詞藻宏麗軍謀出衆等舉人命有司供食既暮而罷其詞藻

宏麗問策外更試詩賦各一首制舉試詩賦自此始也
是月道舉停習道德經加周易宜以來載為始

十四載二月弘文館學生自今以後宜依國子監學生
例帖試明經進士帖經並減半雜文及策皆須粗通仍
永為常式

肅宗至德二載已後依前鄉貢

乾元元年四月詔曰國子監學生明經法帖策口試各
十並通四以上進士通三與及第鄉貢明經准常式州

縣學生放歸營農待賊平之後任依常式

代宗寶應二年六月禮部侍郎楊綰上疏曰國之選士必資賢良蓋孝友純備言行敦實居常有德動不違仁體忠信之資履謙恭之操藏器則未嘗自伐虛心而所應必誠夫如是故能率已從政化人鎮俗者也自叔葉澆詐茲道浸微爭尚文詞互相矜銜馬卿浮薄竟不周於時用趙壹虛誕終取擯於鄉閭自時厥後其道彌盛不思實行皆徇空名敗俗傷風備載前史古人比文章

於鄭衛蓋有繇也近煬帝始制進士之科當時猶試策而已至高宗朝劉思立為考工員外郎又奏進士加雜文明經加帖從此積弊轉而成俗幼能就學皆誦當代之詩長而博文不越諸家之集遞相黨與用致虛聲六經則未嘗開卷三史則皆同挂壁况復徵以孔門之道責其君子之儒者哉祖習既深奔競為尚矜能者曾無愧色勇進者但欲凌人以毀黷為常談以向背為己任投刺干謁驅馳於要津露才揚已宣騰於當代古之賢

良方正豈有如此者乎朝之公卿以此待士家之長老
以此垂訓欲其返敦朴懷禮讓守忠信識廉隅何可得
也譬之於水其流已濁若不澄本何當復清方今聖德
御天再寧寰宇四海之內顛顛向化皆延頸舉踵思聖
朝之理也不以此時而理之則太平之制又乖矣凡國
之大柄莫先擇士自古哲后皆側席待賢今之取人令
投牒自應殊非經國之體也欲望請依古制令縣令察
孝廉審知在鄉間有孝友信義廉恥之行加以經業才

堪策試者以孝廉為名薦之於州刺史當以禮待之試其所通之學其堪者送名於省自縣至省不得令舉人輒自陳牒比來有到狀保辨試牒等一切並停其所習經取左傳公羊穀梁禮記周禮儀禮尚書毛詩周易任通一經務取深達奧旨旁通諸家之義試日差諸司官有儒學者對問每經問義十條問畢對策三道其策皆問古今理體及當時要務取堪行用者其經義并策全通為上第望付吏部便與官其經通八策通二為中第

與出身下第者罷歸其明經比試帖經殊非古義皆誦
帖括異圖僥倖近有道舉亦非理國之體望請與明經
進士並停其國子監人亦請准此如有行業不著所繇
妄相推薦請量加貶黜所異數年之間人倫一變既歸
實學當識大猷居家者必修德業從政者皆修廉恥浮
競自止敦龐自勸教人之本實在茲焉事若施行即別
立條制詔委左右丞相諸司侍郎御史大夫中丞給舍
同議奏聞給事中李栖筠尚書左丞賈至京兆尹兼御

史大夫嚴武各奏議狀與綰同賈至議曰謹案夏之政尚忠殷之政尚敬周之政尚文文與忠敬皆統人之行也且謚號述行美於文文興則忠敬存焉是故前代以文取士本行文也繇詞以觀行則及詞也宣父稱顏子不遷怒不貳過謂之好學至乎修春秋則游夏之徒不能措一詞不亦明乎間者禮部取人有乖斯義易曰觀乎人文以化成天下闕睢之義曰先王以是經夫婦成孝敬厚人倫美教化移風俗蓋王政之所繇廢興也故

延陵聽詩知諸侯之存亡今試學者以帖字為精通不窮旨義豈能知遷怒二過之道乎考文者以聲病為是非惟擇浮艷豈能知移風易俗化天下之事乎是以上失其源而下襲其流波蕩不知所止先王之道莫能行也夫先王之道消則小人之道長小人之道長則亂臣賊子繇是生焉臣弑其君子弑其父非一朝一夕之故其所繇來者漸矣漸者何謂忠信之凌顏恥尚之失所未學之馳騁儒道之不舉四者皆繇取士之失也夫一

國之士繫一人之本謂之風贊揚其風卿大夫也卿大夫何嘗不出于士乎今取士試之小道而不以遠者大者使干祿之徒趨馳末術是誘道之差也夫以蝸蚓之餌雜垂滄海而望吞舟之至不亦難乎所以食垂餌者皆小魚就科試者皆小藝四人之業士最關於風化近代趨士靡然向風致使祿山一呼而四海震蕩思明再亂而十年不復向使禮讓之道弘仁義之風著則忠臣孝子比屋可封逆節不得而萌也人心不得而搖也且

夏有天下四百載禹之道喪而殷始興焉殷有天下六百祀湯之法棄而周始興焉周有天下八百年文武之政廢而秦始皇并焉觀三代之選士任賢皆取實行故能風俗淳一運祚長遠秦坑儒士二代而亡漢興雜三代之政弘四科之舉西京始振經術之學東都終持名節之行至有外戚竊位強臣擅權弱主外立母后專政而社稷不隕終彼四百豈非學行扇化於鄉里哉厥後文章道弊尚於浮侈取士術異苟濟一時自魏至隋四百

餘載三光分景九州阻域竊號僭位德義不修是以子
孫速顛享國咸促今國家草魏晉梁隋之弊承夏商周
漢之業四隩既宅九州攸同覆燾亭育合德天地安有
捨皇王舉士之道從亂代取人之術此公卿大夫之恥
也楊綰所奏實為正論然自典午覆敗中原板蕩戎狄
亂華衣冠遷徙南北分裂人多僑處聖朝一平區宇尚
復因循版圖則張閭井未設士居鄉土百無一二因緣
官族所在耕桑地望繫數百年之外而身皆東西南北

之人馬今欲依制鄉舉里選猶恐取士之未盡也請兼廣學校以弘訓誘今兩京有大學州縣有小學兵革一動生徒流離儒臣師氏祿廩無向貢士不稱行實胄子何嘗講習獨禮部每歲擢甲乙之第謂弘獎擢不亦謬歟祇足長浮薄之風啓僥倖之門矣其國子博士等望加員數厚其祿秩選通儒碩生間居其職十道大郡量大學館令博士出外兼領郡官召置生徒依乎故事保桑梓者鄉里舉焉在流寓者庠序推焉朝而行之夕見

其利如此則青青不復興刺擾擾絲其歸本矣人倫之始王化之先不過是也李廌等議與至協文多不載宰臣等奏以舉人舊業已成難於速改其今歲舉人望且許應舊舉來歲即依新格廣德元年七月禮部侍郎楊綰上貢舉條目曰孝廉舉人請取精通一經每經問義二十條皆須旁通諸義深識微言試策三道每日問道問古今理體取堪行用者經義及策全通為上第望付吏部便與官義通七策通二為中第與出身下第者

罷之論語孝經聖人深旨孟子儒門之達者望兼習此三者為一經其試如上先取在家有孝義廉恥謙恭之行好學不倦精通經義并堪對策者縣令徵於鄉里送名於州刺史與曹官對試以其通者送省既是貢士刺史縣令不得以部人待之加其禮數隨朝集使以十月二十五日到省其鄉飲酒及至上都朝見并謁先師并依舊式又以寇難之故衣冠多去故鄉所居必聞才行斯在望許所在州縣且舉所諳知者秀才舉人准舊格

惟試方畧策五條望令精通五經每經准孝廉例問義
二十條對策五條每日試一道全通為上第送中書門
下超與處分十條通七策通四為中第送吏部與官下
者罷之又國子監舉人亦請每歲本業博士推擇才行
送名與祭酒依鄉貢例試通者送省舉人自縣至州皆
不得輒自陳牒比來有到狀保辨停牒等請並停明法
舉人望付刑部考試疏入帝問翰林學士或以進士明
經行來頗久不可頓令改業遂勅與舊法兼行

是月勅弘文崇文兩館生皆以資廕補充所習經業務
須精熟楷書字體皆得正樣通七者與出身不通者罷
之

二年五月罷歲貢孝悌力田及童子科從禮部侍郎楊
綰奏也綰以孝悌之行宜有實狀童子越衆不在常科
同之歲貢恐成僥倖之路

永泰元年始置兩都貢舉禮部侍郎官號皆以知兩都
為名每歲兩地別放及第

大曆三年四月復置童子科舉每歲本貫申送禮部同
明經考試取十歲以下習一經兼論語孝經每卷誦文
十科全通者與官通七以上者與出身仍每年冬本貫
申送禮部同明經舉人例考試訖聞奏

十年五月詔今年諸色舉人並赴上都集

先是禮部侍郎賈至以時

艱歲歛舉人赴省者衆權奏兩都分理時禮部侍郎常
衮以貢舉人合謁見異於選人並合上都集舉舊章也
是後不置
東都貢舉

是月勅停童子科舉

德宗建中二年二月中書門下奏准制崇玄館學生試日減策一道者其崇玄館附學官見任者既同行事例合霑恩惟策一道不可更減大義兩條從之

六月勅孝廉科宜停

二年十月中書舍人趙贊權知貢舉先時進士試詩賦各一篇時務策五道明經策三道贊奏以箴論表贊代詩賦仍各試策三道應口問大義明經人明經之目義以為先比來相承惟務習帖至於義理少有能通經術

寢衰莫不繇此今若頓取大義恐全少其人欲且因循
又無以勸學請約舉司舊例稍示考義之難承前問義
不形文字落第之後喧競者多臣今請以所問錄於紙
上各令直書其義不假文言既與策有殊又事堪徵證
憑此取舍庶歸至公如有義策全通者五經舉人請准
廣德元年七月勅超與處分明經請減兩選伏請每歲
甄獎不過數人庶使經術漸興人知教本勅旨明經義
策全通者令所司具名聞奏續商量處分餘依

三年四月勅禮部應進士舉人等自今以後如有試官并不合選并諸色出身人有應舉者先於舉司陳狀准例考試如才堪及第者送名中書門下重加考覈如實才堪即令所司進納告身注毀官申准例與及第至選日仍稍優與處分其正員官不在舉限

貞元二年六月勅自今已後舉選人有能習開元禮者舉人同一經例選人不限選數許集但問大義一百條試策三道全通者超資與官義通七十條策通二道已

上者放及第已下不在放限其有試官能通者亦依正員官例處分其明經舉人有能習律一部以代爾雅者如帖義俱通於本色減兩選令即日與官其明法舉人有能兼習一經小帖義通者依明經例處分

五年四月制曰明經舉人所習爾雅多是草木鳥獸之名無益理道宜令習老子道德經以代爾雅其進士同大經例帖

六年九月勅本置兩館學士皆選勳賢胄子蓋欲令其

講藝紹習家風固非開此倖門墮紊典教且令式之內
具有條章考試之時理須精覈比聞此色倖冒頗深或
假市門資或變易昭穆殊虧教化之本但長澆漓之風
未補者務取闕員已補者自然登第用廢既已乖實試
藝又皆假人誘進之方豈當如此自今已後所司宜據
式文考試定其升黜如有假代並准法處分

九年五月制曰王者設教勸學攸先生徒肄業執禮為
本故孔子曰不學禮無以立又曰安上理人莫善於禮

然則禮者蓋務學之本立身之端居安之大猷致治之
要道屬詞比事而不裁之以禮則亂疏通知遠而不節
之以禮則誣實百行之本源為五經之戶牖雖聖人設
教固不會通而學者遵行宜有先後自頃有司定議計
功記習不量教化淺深義理難易遂使修傳學者例從
冬集習禮經者獨授散官敦本勸人頗乖指要始務弘
獎以廣儒風自今已後明經習禮記及第者亦宜冬集
如中經兼習周易若儀禮者量減一選應諸色人中習

三禮者前資及出身人依科目例白身人依貢舉例每
經問大義三十條試策三道仍主司於朝官學官中簡
選精通經術三五人聞奏主司與同試問質定通否義
策全通為上等轉加超獎大義每經通十五條已上策
通兩道已上為次等依資與官如先是員外試官者聽
依正員例其習開元禮人問大義一百條試策三道全
通者為上等大義通八十條已上策兩道已上為次等
餘一切並准習三禮例處分其諸館學士願習三禮及

開元禮者並聽仍永為常式

十年中書侍郎平章事齊抗奏罷禮部別頭舉人故事
禮部侍郎掌貢舉其親故即試于考功謂之別頭舉人
抗奏罷之

十二年三月國子司業裴肅奏爾雅為六經文字之楷
模老子是聖人玄微之奧旨請勒天下明經進士五經
及明一經進士五經及諸科舉人依前習道德經者宜
准天寶元年勅處分應合習爾雅者竝准舊式

初天寶元年尊

崇道教以老子乃玄元皇帝微言與旨不可列為小經
今有司以爾雅代老子至貞元五年四月宰相又議云
所習爾雅多是草木鳥獸之名無益理道又
令舉人停爾雅改習道德經至是又改焉

十三年十二月顧少連為尚書左丞權知貢舉奏伏以
取士之科以明經為首教人之本則義理為先至於帖
書及以對策皆形文字并易考尋試義之時獨令口問
對答之失覆視無憑黜退之中流議遂起伏請准建中
二年十二月勅以所問錄於紙上各令直書其義不假
文言仍請依經疏對奏勅宜依

十四年九月詔鄉貢武舉并應百隻箭及三十隻箭人等今年宜權停時諫議大夫田敦因蒙召對奏言兵部武舉等每年常數百千人持挾弓矢出入皇城間恐非所宜上聞而矍然故命停之其實武舉者每歲不過十數人時議惡敦慣欲非短舊事奏議不實自是訖于貞元更不復置

十六年十二月勅禮部別頭舉人宜委禮部考試不須置別頭

十八年五月勅明經進士自今以後每年考試所收人明經不得過一百人進士不得過二十人如無其人不必要滿此數

十九年六月勅禮部舉人自春以來久愆時雨念其旅食京邑資用屢空其禮部舉人今年宜權停

憲宗元和二年十二月壬申禮部貢舉院奏五經舉人請罷試口義依前試墨義十條五經通五明經通六便放入第從之勅自今以後州府所送進士如迹涉疎狂

兼虧禮教或曾為官司科罰或曾任州府小吏一事不合入清流者雖薄有詞藝并不得申送入如舉送以後事發長吏停見任及已停替者殿二年本試官及司功官并貶降

三年五月兵部奏鄉貢武舉准貞元十四年九月詔宜權停今請准舊例却置從之

七年十二月權知禮部侍郎韋貫之奏試明經請停墨義依舊格問口義從之

十三年十月權知禮部侍郎庾承宣奏臣有親屬應明
經進士舉者請准舊例送考功試之先是貞元十六年
高郢掌貢請停考功別試識者是之至是始復

穆宗長慶元年三月勅今年禮部侍郎錢徽下進士及
第鄭朗等一十四人重試聞奏四月制曰國家設文學
之科本求實才苟容僥倖則異至公訪聞近日浮薄之
徒扇為朋黨謂之關節干擾主司每歲策名無不先定
永言敗俗深用興懷鄭朗等昨令重試意在精覈藝能

不於異書之中固求深僻題目貴令所試成就以觀學
藝淺深孤竹管是祭天之樂出於周禮正經閱其呈試
之文都似不知本事詞律鄙淺蕪累至多亦令宣示錢
徽庶其深自懷愧誠宜盡棄以警將來但以四海無虞
人心方泰用引寧僭式示殊恩特掩爾瑕庶明予志孔
溫業趙存約竇狗直所試粗通與及第盧公亮等十人
並落下錢徽從別勅處分自今以後禮部舉人宜准開
元二十五年勅及第訖所試雜文并策送中書門下詳


覆

二年二月諫議大夫殷侑奏謹案春秋二百四十二年
行事王道之正人倫之紀備矣故先師仲尼稱志在春
秋歷代立學莫不崇尚其教伏以左傳卷軸文字比禮
記多較一倍公羊穀梁比尚書周易多較五倍是以國
朝舊制明經若大經中經能習一傳即放冬集然明經
為學者猶十不一二今明經一例冬集人之常情趨少
就易三傳無復學者伏恐周公之微旨仲尼之新意史

官之舊章將墜於地伏請置三傳科以勸學者左傳問
大義五十條公羊穀梁各問大義三十條策三道義通
七以上策通二以上與及第其白身應者請同五經例
處分其先有出身及前資官應者請准學究一經例別
處分又奏歷代史書皆記當時善惡繫以褒貶垂裕勸
戒其司馬遷史記班固范曄兩漢書旨義詳明懲惡勸
善亞於六經堪為代教伏惟國朝故事國子學有文史
直者弘文館弘文生並試以史記兩漢書三國志又有

一史科近日已來史學都廢至於有身處班列朝廷舊章昧而莫知者况乎前代之載焉能知之伏請量前件史科每史問大義一百條策三道義通七策通二以上為及第能通一史者白身請同五經三傳例處分其有出身及前資官應者請同學究一經別處分其有出身及前資官稍優與處分其三史皆通者請錄奏聞特加獎擢仍請班下兩都國子監任生徒習請勅旨依仍付所司

三年禮部侍郎王起掌貢舉先是貢舉假濫勢門子弟
交相酬酢寒門俊造十棄六七及元稹李紳在翰林深
怒其事故有覆試之科及起考貢士奏曰伏以禮部放
榜已是成名中書重覆尚未及第若重覆之中萬不一
定則放榜之後遠近誤傳其於事理實為非便請今年
進士堪及第者本司考試訖其詩賦先送中書門下詳
覆候勅却下本司然後准例大字放榜從之



冊府元龜卷六百四十

欽定四庫全書

子部
冊府元龜卷六百四十一

詳校官中書臣朱文翰

侍讀臣孫球覆勘

總校官庶吉士臣何思鈞

校對官學正臣常循

謄錄監生臣徐元辰

欽定四庫全書

冊府元龜卷六百四十一

宋 王欽若等 撰

貢舉部

條制第三

唐文宗太和元年七月勅今年權於東都置舉其明經
進士任使東都赴集其上都國子監舉人合在上都試
及節用未盡者委條流聞奏

八月禮部貢院奏東都置舉條件其上都國子監宗正

寺鴻臚寺舉人並請待東都考試畢却迴就上都考試從之

十月中書門下奏應禮部諸色科目選人等凡未有出身未有官如有文學只合於禮部應舉有出身有官合於吏部赴科目選近年以來格文差互多有白身及用散試官并稱鄉貢者並赴科目選及注擬之時即妄論資次曾無格例有司不知所守其宏詞拔萃學究一經則有定制然亦請不在用散試官限其三禮三傳一史

三史明習律令等如白身並令國子監及州府同明經一史三禮三傳同進士三史當年闕送吏部使授第二任官如有出身及有正員官本是吏部常選人則任於吏部不限選數應科目選三史則超一資授官如制舉人既諸色人中皆得選試則無出身官人並可亦請不用散試官從之

是月京兆府鄉貢明經孫延嗣等三百人進狀舉大厯六年七年例請同國子監生上都考試許之

二年十二月禮部貢院奏五經明經舉人試義請准元和十四年十一月四日勅以墨義代口義許之

三年八月禮部奏進士舉人先試帖經并畧問大義取經義精通者次試議論各一首文理高者便與及第其所試詩賦並停者伏請帖大經各十帖通五通六為及格所問大義便於習大經內准格明經例問十條仍對衆試口義伏惟新制進士畧問大義緣初釐革今且以通三通四為格明年以後並依明經例其所試議論請

各限五百字以上成勅旨依奏

四年十月中書門下奏應開元禮學究一經三禮三史
明習律令科人等准太和元年十月二十三日勅散試
官及白身人並於禮部考試其有出身及有官人並吏
部科目選者凡是科日本合在吏部試自分兩處考試
每處皆別與人數轉多事理非便臣等商量坐准前吏
部收試其諸節目並准太和元年十月二十三日勅處
分從之

七年八月制公卿士族子弟明年已後不先入國學習
業不在應明經進士之限其進士舉宜先試帖經并畧
問大義取經義精通者次試議論各一道文理高者便
與及第所試詩賦並停其試帖官便以國子監學官充
禮部不得別更奏請弘文宗文兩館生齋郎並依令試
經畢仍差都省郎官兩人覆試須責保任不得輒許替
代

八年正月禮部奏明經弘文宗文館生太廟郊神齋郎

掌坐等共五百五十二人今六色共請減一百三十八人從之

是月禮部侍郎李漢奏准太和七年八月勅貢舉人不要試詩賦策且先帖大經小經共二十帖次對正義十道次試議論各一首訖考覈放及第

是月中書門下奏進士放榜舊例禮部侍郎皆將及第人名先呈宰相然後放榜伏以委在有司固宜精慎宰相先取捨事匪至公今年已後請便令放榜不用先

呈人名其及第人所試雜文及鄉貢三代名諱並當日
送中書門下便令定例勅旨依奏

八月詔罷諸色選舉以歲旱故也

九月勅吏部禮部兵部今年選舉並緣秋末蟲旱相因
恐致災荒權令停罷及歛歲之後物力且任念彼求名
之人必懷缺望之念寧違我令以慰其心宜依常例却
置應緣所納文狀及銓試等期限仍准今年格文遞延

一月

十月禮部奏進士舉人自國初以來試詩賦帖經時務策五道中間或整改更旋即仍舊蓋以成法可守所取得人故也去年八月節文先試帖經口義論議等以臣商量取其折衷伏請先試帖經通數依新格處分時務策五道其中三道問經義兩道時務其餘並請准太和六年以前格處分勅旨依奏

九年十二月中書門下奏今月九日閣內面奉進止今條流進士人數及諸色人等進士元格不得過二十五

人今請加至四十人明經元格不得過一百一十人今請減十人伏以國家取士遠法前代進士之科得人為盛然於入世須更指撝必使練達固在經歷起來年進士及第後三年任選委吏部依資盡補州府叅軍緊縣簿尉官滿之後來年許選三考後聽諸使府奏用便入協律郎四衛佐未滿三考不在奏改限如任江淮官特與勉其綱使又聞每年貢士常僅千人據格所取其數絕少強學待用常年不試孤貞介士老而無成甚可惜

之臣等商量望付所司精求行藝起來年添滿四十人
及第仍委禮部於所試諸色貢舉人元格數內共減一
十五人都守每年放出身黃衣人數永為定制編入常
格庶令才人速得自効經於下位以致上達可之

開成元年正月詔文武之道合而兼濟勲臣子弟有能
修詞務學應進士明經及通諸科者委有司先加獎引
自其年至二年三年並高錯知貢舉每年皆恩賜題目
及第並四十人

二年五月禮部奏請每年進士以三十人為限從之

十二月勅諸道應薦萬言童子等朝廷設科取士門目

至多有官者合詣吏曹未仕者即歸禮部此外更或延

引則為冗長起今後不得更有聞薦俾繇正路真絕倖

門雖有是命而以童子為薦者比比有之

四年十月勅每年明經及第宜更與十人

武宗會昌三年正月勅禮部所放進士及第人數目今後但據才堪者即與不要限人數每年止於十人五人

總得

是月宰臣李德裕等奏舊例進士未放榜前禮部侍郎
遍到宰相私第先呈及第人名謂之呈榜比聞多有改
換頗致流言宰相稍有寄情有司固無畏忌取士之濫
莫不繇斯將務責成在於不撓既無取舍豈必預知臣
等商量今年便任有司放榜更不得先呈臣等仍向後
便為定例如有固違御史糾舉奏者其時有勅重試進
士因栖霞塔災且止

四年二月權知貢舉左僕射判太常卿王起下及第二

十五人續奏五人堪放及第楊知至竇緘楊嚴鄭朴源

重奉勅只放楊嚴及第餘並落下

王起項年知貢舉每貢院考試訖上榜後

更呈宰相取可否復人數不多宰相延英論言主司試藝不合取宰相與奪比來貢舉艱難故人絕少恐非引誘之道帝曰有司不會我意不放子弟即太過無論子弟寒門但取實藝耳李德裕對曰鄭肅封赦有好子弟不敢應舉帝曰我比聞楊虞卿兄弟朋比貴勢妨平進之路昨楊知至鄭朴之徒並令落下抑其太甚耳德裕曰臣無名第不合言進士之非然臣祖天寶末以仕進無他岐勉強隨計一舉登第自後家不置文選蓋惡其祖尚浮華不根藝實然朝廷顯官湏是公卿子弟何者因小便習舉業目熟朝廷間事臺閣儀範班行准則不

教而自成寒士縱有出人之才登第之後始得一
班一級固不能習熟也則子弟成名不可輕矣

十月中書門下奏朝廷設文學之科以求髦俊臺閣清
選莫不繇茲近緣覈實不在於鄉閭趨名頗雜於非類
致有跋扈之地情計交通將澄化源在舉明憲臣等高
量今日以後舉人於禮部納家狀後望依前三人自相
保其衣冠則以親姻故舊久同遊處其有江湖之士則
以封壤接近素所諳知者為保如有缺孝弟之行資朋
黨之勢跡繇邪徑言涉多端者並不在就仕之限如容

情故自相隱蔽有人糾舉其同保人並三年不得赴舉仍委禮部明為戒勵編入舉格從之

五年三月中書門下奏貢舉人並不許於兩府取解仰於兩都國子監就試

宣宗大中元年正月禮部侍郎魏扶放及第二十三人續奏堪放及第三人封彥卿崔琢鄭延休等皆以文藝為衆所知其父皆在重任不敢選取其所試詩賦並封進奏進止令翰林學士戶部侍郎知制誥韋琮等考盡

合程度其月二十五日奉進止并赴所司放及第有司
考試只合在公如涉徇私自自有刑典從今以後但依常
例取捨不得別有奏聞

是月勅自今放進士榜後杏園任依舊晏集所司不得
禁制

六月中書門下奏貢舉人取解宜准舊條於京兆府河
南府集試從之

十年四月禮部侍郎鄭顥進諸家科目記十三卷勅付

翰林自今放榜後仰寫及第人姓名及所試詩賦題目
進入內仍付所司逐年編次

五月中書門下奏據禮部貢院見置科目內開元禮三
禮三傳三史學究道舉明算明法童子等九科近年取
人頗濫曾無實藝可採徒添入仕之門須議條流俾精
事業臣等已於延英面論伏奉聖旨將文字來者其前
件九科臣等商量望起大中十年權停三年滿後至時
赴試者令有司據所與人先進名令中書舍人重覆問

過如有本業精通堪備朝廷顧問即作等第進名候勅處分如事業荒蕪不合送名數者考官當議朝責其童子近日諸道所薦送者多年齒已過偽稱童子考其所業又是常流起今以後望令天下州府薦送童子並須實年十一十二以下仍須精熟一經問全通兼自能書寫者如違制條本道長吏亦議懲罰從之

十二年三月中書舍人李潘知舉放博學宏辭科陳琬等三人及進詩賦論等名潘謂曰所賦詩中重用字何

如潘曰錢起湘靈鼓瑟詩有重用字乃是庶幾帝曰此詩似不及起乃落下

十三年十二月河中節度使令狐絢以其子瀉求應進士舉勅曰令狐瀉多時舉人極有文學流輩所許合得科名比以父絢職在樞衡避嫌不赴今因出鎮却就舉場况諧通規合試至藝宜令主司准大中六年勅考試只在至公如涉徇情自有刑典從今以後但依常例放榜本司舉士貴在得人去留之間惟理所在

懿宗咸通十一年四月勅去年屬以用軍之際權停貢
舉一年今既偃戈却宜仍舊來年宜別許三十人及第
進士十人明經二十人已後不得援例

景宗天祐三年正月國子監奏得監生郭應圖等六十
人狀稱伏覩今年六月五日勅文應國學與諸道等明
經一例解送兩人者應圖等早辭耕稼夙慕詩書自拋
鄉邑之中便忝國庠之內棲遲守學輒軻於時未諧昇
進之期却抱減退之患苟或諸道解送監府同條實謂

首尾難分本枝無異伏請聞奏俾遂渥恩者又河南府
奏當府取解明經舉人周定言等二十七人各據取解
差司錄叅軍崔蘊考試並已及格伏緣明經舉人先准
勅諸州府解送不得過二人者今當府除去留外見在
二十七人考試並已及格若只送二人必恐互有爭論
難以指揮者勅曰取士之科明經極重每年人數已有
舊規去夏雖舉條流蓋慮所司踰濫今者國子監既有
聞奏河南府亦具陳論不念遠人何以誘進只在乎升

陟之際切務公平又何必解送之時便為沙汰將免遺才之嘆須開汲善之門特改舊條俾循往例國子監河南府所試明經並依准常例解送禮部所放人數亦許酌量施行但不得苟徇囑求遂致僥倖兼下諸道准此二月禮部奏伏以朝廷累年多事道途艱辛在遠舉人併阻隨計逐年所司放榜人數不常量其少多臨事增減今者干戈稍弭水陸漸通舉人等皆負笈擔簦裂裳裹足來求試藝競切觀光雖人數不廣於近年而貢籍

頗甚其屈譽至於俊造亦有其人臣今欲於去年數外更放三數人佇開勸誘之門以贊文明之運已選今月二十一日放榜伏候進止者勅曰朝廷取士之科每歲擇才之重必資藝實以副勤求或來自遠途或久稽鄉薦今年就試多有屈人所司奏論是宜俞允苟叶無私之道俾開振滯之門切在精詳佇觀公當其禮部所放進士於舊年人數外宜令更添兩人

梁太祖開平元年六月詔近年諸道貢舉人當藩方秋

薦之時不親試者號為拔解非所以責實也帝因知之乃下令止絕

三年勅條流禮部貢院每年放明經及第不得過二十人

四年十二月兵部尚書知貢舉姚洎奏曰近代設詞科選胄子蓋所以網維名教宗樹邦本者也曩時進士不下千人嶺徼海隅偃風嚮化近歲觀光之士人數不多加以在位臣僚罕有子弟就其寡少復避嫌疑實恐因

循漸為廢墜今在朝公卿親屬將相子孫有文行可取者請許所在州府薦送以廣毓才之義從之

乾化元年十二月以尚書左僕射楊涉知禮部貢舉非常例也前代自唐武德貞觀之後但委考功員外郎掌之至開元二十五年員外郎李昂為貢士李權所詆繇是中書奏請以禮部侍郎專焉其間或以他官領者多用中書舍人及諸司四品清資官准會昌中命太常卿王起主貢舉時乃檢校僕射耳

後唐莊宗同光二年三月勅選舉二門仕進根本當掄
擇於多士全委仗於有司苟請託是從則踰濫斯極况
方行公事已集羣材須行戒勵之文俾絕倖求之路宜
令吏部禮部翰林考藝必盡於精詳減私徇公無從於
請託仍委三銓貢院榜示省門曉告中外

十月中書門下奏獻可効忠前經之令典因時建議有
國之明規道既務於化成事亦敷於競勸敢俾宸聽輒
罄芻言伏惟陛下業茂經綸功成理定五材七德威冠

於成謀百氏三墳義彰於知教爰自中興啓運下武膺
期炤臨而日月光華鼓舞而乾坤交泰英明取士睿哲
崇儒誠宜便廣於搜羅豈可尚令於淹抑但以今春貢
士就試不多即目選人磨勘未畢宗伯莫臻於俊乂天
官難辨於妍媸况已過秋期將行公事例間道路悉是
家貧比及到京多踰程限文闈選部皆礙條流伏請權
停貢選一年俟遷駕者更勵進修希干祿者益加循省
然後精求良幹博採異能免有遺賢庶同樂聖勅舉選

二門國朝重事俱要精確難議權停宜准常例處分

三年三月勅禮部貢院今年新及第進士符豪正成僚
王徹桑維翰四人國家歲命春官首司貢籍高懸科級
明列等差廣進善之門為取士之本所重者藝行兼著
鄉里有稱定才實之淺深振聲名於夷夏必當得雋允
副旁求爰自近年寢成澆俗多聞濫進全爽舊章朕自
興復丕圖削平偽紀方作事以謀始盡革故以鼎新蓋
欲窒弊正訛去華務實誠為要道無切於斯今據禮部

奏所放進士符蒙正等四人既慙輿情頗干浮論須令
覆試俾塞羣言又遣考詳貴從精覈及再覽符蒙正成
僚等呈試詩賦果有瑕疵今若便有去留慮乖激勸儻
無昇降即眇甄明况王徹體物可嘉屬辭甚妙細披製
作竅異儕流但應試以効成或求對而不切桑維翰若
無紕繆稍有功夫止當屬對之間每失求妍之美須推
事藝各定否臧貴叶允平庶諧公共其王徹改為第一
桑維翰第二符蒙正第三成僚第四禮部侍郎裴皞在

掄材之際雖匪阿私當定名之時頗虧優劣但緣符蒙
正等既無絀落裴皞特議寬容勿負憂疑已從釋放自
今後應禮部常年所試舉人雜文策等候過堂日委中
書門下准本朝故事細加詳覆方可奏聞不得輒徇人
情有隳事實時命盧質覆試於翰林院試君從諫則聖
賦以堯舜禹湯傾心求過為韻臣事君以忠詩是歲試
進士科者數十人裴皞精選其文惟得王徹輩或譖毀
於宣徽使李紹宏曰今年新進士不繇才進各有阿私

物議以為不可紹宏訴於郭崇韜因奏令盧質覆試質為賦韻五平聲三仄聲且踰常式覆試之日中外騰口議者非之

五月禮部貢院奏當司准流內銓牒應請定冬集舉人內有前鄉貢童子者三銓已前團奏冬集皆暨前鄉貢童子伏准格文只有童子科此無鄉貢字銓司先為請定冬集舉人九經張仲宣等內有前鄉貢明經童子成光誨遂檢尋六典及蘓冕會要又無本朝書子細檢討

惟有閏十三年十二月勅諸道應薦萬言及童子起今
後不得更有聞薦據此童子兩字皆由諸道表薦固無
鄉貢之名又無口議帖經亦不合有明經之字進則止
於暗誦便號神童此外格文別無童子其成光誨銓司
准格只收豎前童子團奏去二月十五日具狀申留司
宰臣取裁奏例准申者伏緣三銓見團奏冬集右內有
鄉貢及明經字已依成光誨例准格只豎童子團奏次
者左伏以院司常年考試皆憑諸道表薦降勅下到當

司准格考試及格者便放及第其同光二年童子郭忠恕等九人皆是表薦童子勅內并納到家狀並有鄉貢兩字院司檢勘同便榜示引試及第後先具白闕牒報吏部南曹續便團奏春闕奏狀下到中書省追當司元下納家狀檢點同覆奏放勅經過諸處勅下後方始到當司備錄黃闕牒報御史臺尚書省并吏部南曹令准流內銓牒伏緣院司承前皆憑勅命施行童子勅內並有鄉貢兩字若使下落恐涉專擅者奉勅起今後宜准

開成三年勅文凡有官者並詣吏曹未仕者皆歸禮部
其童子則委本州府依諸色舉人例考試結解送省任
稱鄉貢童子長吏不得表薦若無本處解送本司不在
考試之限

八月勅條例諸道州府不得表薦童子

四年正月五科舉人許維岳等一百人進狀言伏見新
定格文三禮三傳每科只放兩人方今三傳一科五十
餘人三禮三十餘人三史學究十人若每年止放兩

人及一人逐年又添初舉縱謀進修皆恐滯留臣伏見
長慶咸通年放舉人元無定式又同光元年春榜亦是
一十三人請依此例以勸進修勅依同光元年例永為
常式

明宗天成元年八月勅應三京諸道今年貢舉人可依
常年例取解仍令隨處津送赴闕

二年正月尚書禮部貢院奏五經考試官先在吏部日
長定合請兩貢數年係屬貢院准新定格文祇令奏請

一貢兼充考試伏緣今年科目人數轉多却欲依舊請
考試官各一貢如蒙允許續具所請官名進御申奏奉
勅宜依

是年四月中書奏禮部貢院申當司奉今月六日勅吏
部流內銓狀申據白院狀申當司先准禮部貢院牒稱
具成德軍解送到前進士王蟾狀請罷攝深州司功叅
軍應宏詞舉前件人准格例應重科合在吏部其王蟾
并解送吏部請准例指縱者當司遂具狀申堂奉判送

吏部分折近年事例如何者伏緣近年別無事例今檢登科錄內於偽梁開平三年應宏詞登科二人前進士余渥承旨舍人李愚考官二人司勳郎中崔景兵部員外郎張貽憲者再具狀申堂奉判送吏部准例指揮者其前進士王蟾應宏詞考官試官合在流內銓申請者前進士王蟾請應宏詞伏自近年以來無人請應今詳格例合差考官二人又緣只有王蟾一人獨應銓司未敢懸便奏請差官者奉中書門下牒奏勅宜令禮部貢

院就五科舉人考試者伏以舉選公事皆有格條准新定格勅文宏詞拔萃准長慶二年格吏部差考試官二人與知銓尚書侍郎同考試聞奏又准格節文內准太和元年十月二十三日勅應禮部諸色貢舉人及吏部諸色科目選人凡無出身及未有官只合於禮部應舉有出身有官方合於吏部赴科目選其請應宏詞舉前進士王蟾當司當年放及第後尋已開過吏部訖若應宏詞例待南曹判成即是科選選人事理合歸吏部况

緣五科考試官只考學業難於同考宏詞者奉勅王蟾
宜令吏部准往例差官考試

十二月勅新及第進士有聞喜宴春闈宴逐年賜錢四
十萬

三年春趙鳳知貢舉場中利病備達天聽因勅進士帖
經通三即可五科試本業後對策全精即可諸經學帖
經及格後於大經沉問五義尚書於試紙令直解其理
通三即可對策並須理有指歸言闕體要

七月工部侍郎任贊上言曰伏以聖代設科貢闈取士必自鄉薦來觀國光將叶公平惟求藝行蓋廣搜羅之理且非喧競之場伏見常年舉人等省門開後春榜懸時所習既未精妍有司寧免黜落或嫉其先達或恣以厚誣多集怨於通衢皆取駭於羣聽頗虧教本却成亂階宜立新規以革前弊自今後諸舉人不是家在遠方水陸隔越者望本令各於本貫選藝精通賓寮一人考試如非通贍不許妄薦儻考覈必當即試官請厚於甄酬

若薦送稍私并童子盡歸於竄逐與彰睿化免紊儒風
庶絕濫進之人共守推公之道

是日勅宜令今後諸色舉人委逐道觀察使慎擇有詞
藝及通經官貢各據所業考試及格者即與給解仍具
所試詩賦經帖通精數一一申省未及格者不得徇私
發解兼承前諸道舉人多於京兆府寄應例以洪固鄉
胃貴里為戶一時不實久遠難明自此各於本道請解
具言本州縣某鄉某里某為戶如或寄應湏具本貫屬

入狀不得劾洪固胃貴之例文解到省後據所稱貫屬
州府戶籍內如是無名本人并給解處官吏必加罪責
京百司發解就試准前指揮兼下貢院具本朝舊格諸
色舉人每年各放幾人及第到日續更詳酌處分

是月勅應將來三傳三禮三史開元禮學究等考試本
業畢後引試對策時宜令主司須於時務中採取要當
策題精詳考校不必拘於對屬須有文章但能周通文
字典切即放及第如不及此格雖本業精通亦須黜落

應九經五經明經帖書及格後引試對義時宜令主司於大經汎出問義五通於簾下書於試紙令隔簾逐段解說但要不失疏注義理通二通三然後便令念疏如是熟卷並須全通仍無失錯始得入策亦須於時務中選策題精當考校如精於筆硯留意者得則以四六對仍須理有指歸言闕體要如不曾於筆硯致功則許直書其事不得錯使文字只在明於利害其問義念疏對策逐件須有去留

是月勅近年諸道解送童子皆越常規或年齒漸高或精神非俊或道字頗多訛舛或念書不合格文主司若不去留貢部積成乖弊自此後應諸道州府如公然濫發文解畧不考選藝能其逐處判官及試官並加責罰仍下貢院將來諸道應解送到童子委主司精專考校須是年顏不高念書合格道字分明無無蹙失即放及第仍依天成三年例主司未出院間便引就試與諸科舉人同日放榜不得前却

十二月戊午禮部貢院以諸色及第人失墜出身請同年一人充保次年及第二人充保即重給春闈已未以近令進士帖經通三即放慮非所知致今年令不及通三亦放來年秋賦詞人並令對義

四年二月貢院雖鎖未試舉人勅先往雒京赴本省就試

七月貢院奏今年諸色及第人中有曾攝州縣官及有御署攝牒兼或有正授官及曾在賓幕赴舉者諸條格

中書奏及第人先曾授職官者宜令所司於守攝文書
內暨重任舉及第年月日或改名不改名分明印押懼
其轉賜於人假資冒進也其中曾授正官御署并佐幕
者仍約前任資序與除一任官如自中興以來諸科及
第人曾授職官者並令所司追給文書到日准今年及
第人例處分已授官者不在此限兼勒貢院將來舉人
納家狀內各分析曾為官及不曾為官改名不改名其
曾為職官者先納歷任文書及第後准例指揮從之

是月勅應今年新及第人給春闈並於敷政門外宣賜
慮所司邀頡故也

十月中書門下條流貢舉人事件應諸道州府解送諸
色舉人須准元勅差有才藝公正官考試及格然可給
解仍具所試詩賦義目帖繇送省如逐州府解內不暨
出前件指揮事節所司不在引試之限禮部貢院考試
諸色帖經舉人今後據所業經書對義之時逐經須將
生卷與熟卷中半考試不得依往例只將熟卷試問今

後主司不得受內外官寮書題薦託舉人及安排考試
官如或實講知有才學精博者任具奏聞若受書題囑
託致有屈人其主司與發書人並加黜責其所舉人別
行朝典三銓南曹亦不得受諸色官貢書題薦託選人
如違並准前指揮應諸色落第人此後所司具所落事
繇別張懸文榜分明曉示除諸州府解送舉人外餘有
於河南府寄應及宗正寺國子監生等亦須准上指揮
其中有依託朝臣者於解內具言在某官某姓名門館

考試及第後並據姓名覆試諸色舉人至入試之時前五日內據所納到試紙本司印署訖却送中書門下取中書省印印過却付司給散逐人就試貢院合請考官試官今後選舉業精通廉慎有官者充人在朝臣門館人不得奏請奉勅宜依

是月兵部尚書盧質奏請逐年諸色貢舉人州府取解之時選強明官考試具詩賦義自送省從之

五年正月禮部貢院奏當司准天成三年十二月十八

日勅文內准近勅自此進士試雜文後據所習本經一
一考試須帖得通三已上即放及第者奉勅進士帖經
本朝舊制蓋欲明先王之旨趣潤才子之文章近代以
來此道稍墜今且上從元輔下及庶寮雖負藝者極多
能帖經者甚少恐此一節或滯羣材既求備以斯難庶
觀光而是廣今年凡應進士舉所試文策及格帖經或
不及通三與放及第來年秋賦詞人所習一大經許令
對義義目多少次第仍委所司件奏者其今年逐處所

解送到進士當司引試雜文帖經後欲令別於所習一
大經內對義目五道考試通二通三准帖經例於其入
策其將來秋賦諸寺監及諸道州府所解送進士等亦
准去年十月一日勅條流考試其詩賦義目帖由等解
送赴省如或不依此解送當司准近勅並不引試奉勅
宜依

冊府元龜卷六百四十一